

2025-mut aningaasanut inatsisisatut siunnersuut
(Aningaasaqarnermut Akileraartarnermullu Naalakkersuisoq)

Naqqiut

20. september 2024-mi saqqummiussisummut taarsiut.
(Saqqummiussisummi tamarmi allannguisoqarpoq)

Saqqummiussineq

Siullermeernera

2025-mut aningaasanut inatsisisatut siunnersuut Naalakkersuisut sinnerlugit matumuuna saqqummiuppara.

Ukioq manna aningaasanut inatsisisatut siunnersuut manna qinigaaffimmi kingullersaraat. Siunnersummi attassinnaasumik siuariartornissaq inuttullu atukkatigut oqimaaqtigiittumik aaqqissusseqqinnerit pisariaqartut pingaartinneqarput. Siunnersuut aningaasaqarnermi siuariartornermik suliffissaaleqisullu aatsaat taamak ikitsignerannik aamma tunngaveqarpoq. Aningaasaqarneq pitsaasumik siuariartorluartoq, ukiuni aggersuni suli aaqqissusseqqittoqartariaqarpoq.

Minnerunngitsumik qinersisoqartussaanerani tamanik takunnissinnaalluarnissaq nunatsinnilu aaqqissuussaaneremi ilungersunartut isiginiaannarnissaat pingaarpoq. Piffissamut sivisuumut aaqqiissuteqarnissaq piginnaasaqartunillu sulisussaaleqineq Namminersorlutilu Oqartussat pigisaannik aalaakkaasunik aserfallatsaaliuinerup kinguaattoornera iliuuseqarfingiarlugit aalajangersimasunillu aningaasaliinissanik pisariaqartitsivugut. Piffissamut sivisuumut aningaasaqarnerup patajaatsuunissaa ataatsimullu tapiissutinik isumalluuteqarnerup annikillisinnissaa qulakteerniarlugit aningaasanik isaatitsivissanik nutaanik aamma pisariaqartitsivugut – attaveqaasersuinerit annertuumik aningaasarpassuit atorlugit aningaasaliffigisimasatta saniatigut, assersuutigalugu takornariartitsarnerup ineriartinneratigut suliffissaqarnermilu erngullu nukinganik atuinikkut. Isertitsivissat nutaat qulakteerneqarnerat suliaqarfinnik tassa oqartussaaffinnik amerlanerusunik naalagaaffimmit tigusinissami aamma pisariaqarput sukkatsisarnissaat. Isertitaqarnerunissattami nunap karsiata naalagaaffimmit ataatsimut tapiissutinik isumalluuteqarnerup annikillisinnissaanut aamma ingerlasariaqaratta.

Naalakkersuisut manna siunnersuutikkut innuttaasunut tamanut iluaquatasumik aamma siuariartorerup atugarissaarnerullu naapertuilluartumik agguannerisa qulakteerneratigut nunatsinni aningaasaqarnerup inuttullu atukkat pitsangorsarnissaannik sapinngisannguartik tamaat naapertorlugu suliniuteqarneq ingerlatseqqissavaat.

Aningaasanut inatsisissatut siunnersummut tunuliaqtit

Nunatta aningaasaqarnera ingerlalluarpoq, naak nunarsuup sinnerani aningaasaqarnerit ukiuni kingullerni ajornartoornerit kingunerannik ilungersunartorsiortut arlaqaraluartut.

Aningaasaqarneq aalisarnermik inuussutissarsiu tip kinguneranik 2022-mi 2023-milu procenti marluk missannik siuariartarnikuuvooq, aalisakkammi akigititatsialannut tuniniarneqarput.

Tamannali ukiuni tulliuttuni allanngussasoq ilimasaarutigineqarluni. Taamaattumik mianersortumik aningaasatigut aqtsinissaq pisariaqarluni.

Nunatsinnili sanaartornermi piffinni siammasissumi aningaasaliiffigineqarneri annertuumik ingerlanneqarput, tassani pingaartumik Nuummi, Ilulissani Qaqortumilu mittarfiliyornerit pingaaruteqarlutik.

Aningaasaqarnerup ingerlalluarnera suliffeqarfeqarfimmii ersippoq, tassani suliffissarsiortut sumiiffiit amerlanerni ikippit. Tamanna suliffissaaleqisoqanngingajanneranik takutitsivoq. Peqatigitillugu januaarimi 2024-mi aningaasat naleerukkiartornerat 2,2 procenti sinnilaaraa uuttuinerit kingulliit takutippaat, tamannalu ukiup siuliani piffissami tassani 2,5 procentiunieranut sanilliullugu appiarneruvoq.

Aalisarneq nunatsinni namminersorluni inuussutissarsiornermi suliffissaqartitsinermik, naleqarnerulersitsinermik avammullu tuniniaanermik suli pingaarnersaavoq. Aalisakkanit tunisassiat 2023-mi nioqqutissat avammut tunineqartut tamarmiusut 98 procenteraat. Aalisakkani tunisassiat nalingi 5,9 milliardinut qaffapput, tamannalu ukiup siulianut sanilliullugu 2 procentip missaanik siuariarneruvoq. Aalisarneq pillugu inatsit maaji 2024-mi akuerineqaqqammertoq aaqqissusseqqinnernik arlalinnik aalisarnermik inuussutissarsiu tip inuiaqatigiinnut iluaqutaasumik, attassinnaasumik piffissamilu sivisuumi quvakkeerinnittussanik imaqarpoq.

Naatsorsuutaavoq mittarfiliornernut aningaasaliinerit ukiuni aggersuni ingerlatsinerit annertusitiinnassagaat. Suliniutit taakku naammassippata Utoqqarmiut Kangerluarsunnguata allilerneranik aamma erngup nukinganik nukissiorfimmik Qasigiannguit Aasiaallu akornanniittumi pilersuisussamik nutaamik pilersitsinissat aallartinneqassapput.

Ilungersunartut pingarnerit

Aningaasaqarnikkut aaqqissusseqqittoqanngippat, ukiut tulliuttut pisortat aningaasaqarnerat annertuumik amigartoorfiusussanngorsinnaavoq. Taamaammat ataatsimut isigalugu erseqqissassallugu pingaaruteqarpoq, isertitat annertusisartariaqartut aammalu aningaasartuutit annikillillusariaqartut. Inuiaqatigiinniit aningaasarpassuarnik atuiffigisatta ilagaat assersuutissaqqissinnaasoq tassalu meeqqat angerlarsimaffiup avataanut inissinneqartartut ullumikkut misissuinerit takutimmassuk 2023imi meeqqat 843it missaanniittut angerlarsimaffiup avataanut inissinneqarsimasut. Aningaasanngorlugu 2023-imiinnaq ukiumut 466 mio. missaat atorsimavagut. Ukiunilu kingullerni sisamani 1,6 mia. pisortaniit børnehjeminut inissiinerni aningaasat atorneqarsimasut isumaginninnerut aqutsisoqarfiup kisitsisaataanni paassisutissiissutigineqarmat. Malugalugu matumani angajoqqaarsiaasarnut aningaasat atorneqartartut ilaatinneqannginnerat.

Tamanna aningaasaqarnermik oqimaaqtigiiissitsissaq siunissamilu pisortat aningaasaqarnerannik pitsasumik tunngaviliisariaqaratta. Taamaammat tamanna anguniarlugu, aaqqiissutissanik aalajangersimalluni ujartuisoqartariaqarpoq.

Nunatsinni suliffissaqartitsilluarnerup nalaaniippugut, sulisussaaleqisoqarpiarnani aningaasallu naleerukkiartornerat nunanut allanut sanilliullugu annikinnerulluni, aningaasaqarnermi atugarissaartoqarfiugaluartoq aamma ilungersunartoqarpoq. Tassami aanaartornermi suli niuerneq nalorninartoqarpoq, tamannalu ernianut aningaasartuutit qaffasinnerat, atortut akisunerannik piginnaasaqartunillu sulisussaaleqisoqarneranik piissuteqarpoq. Tamatuma saniatigut pisortat illuutaannik atortulersuutinillu aserfallatsaaliuinermi annertuumik kinguaattooqqasoqarluni. Aserfallatsaaliinikkut kinguaattooqqaneq iliuuseqarfingineqanngippat annertusiartussaaq taamaalillunilu kinguaassatsinnut nanertuutaanera ukiut tamaasa annertuneruleriartussalluni. Inuiaqatigiit pigisaannut akisussaassuseqartoqartariaqarpoq taakkulu pitsasuuginnarnissaat qularnaarneqartariaqarpoq, taamaalilluta kingulissatsinnut akiitsunik akiligassangorttsinnginniarnissaq aqqutissaanngitsoq Naalakkersuisuni isumaqarpugut.

Aningaasaqarnerup ineriartuinnarnissa siuariartuinnarnissaalu qulakteerniarlugit namminersortunut pisortanullu sulisussarsiornerunissaq pingaaruteqarpoq. Ilungersunartunimi taakkunani nunatsinni aningaasaqarnerup attassinnaasumik piujuartumillu siuariartornissaanik tapersiisinaasunik aaqqissuuussamik aalajangersimallunilu aaqqiissutissanik nassaarnissaq pisariaqarpoq, tassunga ilanngullugit ilinniartitaanermi suliniutit sunniuteqarnerunissaat pissutsillu taakku inuiaqatigiinni pisariaqartitanut sammiveqartinnerat. Tamatuma saniatigut *sulisinnaasut* inuiaqatigiinnut tapersiinissamut periarfissaqarnissaat aamma kajumissuseqarnissaat qularnaartariaqarpoq. Taamaammat, kommunit suleqatigalugit, ilaatiqut siusinaartumik utoqqalinersiat malittarisassaannik pitsanngorsaanissamut suliarinnittarnermullu periarfissarsiorpugut, taamaasilluni innuttaasut pisortanit pisartagallit ikinnerulissammata.

Peqatigitillugu ukiuni aggersuni ukioqatigiit amerlasuut utoqqalillutik suliunnaartussaanerat pimoorullugu piareersarfiginerusariaqarparput taamaammallu innuttaasut ikitsuinnaat pilersuilersunngornissaat piareersarluarfegalugu ingerlasariaqarluta. Tamatumani inuusuttut inuussutissarsiornermi piginnaasaqalerfiusunik ilinniarnissaat kisimi pisariaqartinnejqanngilaq, aammali soraarnerussutisianut aaqqissuuussap siunissamut qulakteerneqartariaqarpoq, aaqqiissutissartailu nalimmassaassutigalugit. Taamaammat taakku Naalakkersuisut Attassiinnarnissamut Ineriartorttsinissamullu Pilersaarutaanni II-mi suliniuteqarfiupput pingarneriugaasut.

Utoqqaat amerliartornerat ajortunngilaq. Taamaattorli inuiaqatigiit agguataarnerisa annertuumik allanngornerat aningaasaqarnerup attassinnaaneranut toqqaannartumik sunniuteqartut matumani pineqarput eqqaamanissaat. Naalakkersuisut isumaqarput ukiuni aggersuni aningaasanut inatsisini akisussaassusilimmik sinneqartoortoqartarnissaa tamannalu anguniarlugu pisariaqartunik pingarneriuisoqarnissaa pingaaruteqarluinnartuusut. Aningaasaqarnikkut aaqqissuuusseqqitoqanngippat naatsorsuutaavoq, ukiuni tulliuttuni aningaasaqarnermut inatsisisani annertuumik sipaaruteqartariaqassalissasoq.

Akileraartarnermik akitsuutinillu aaqqissusseqqinneq

Inunnut akileraaruseriaatsimik akitsuuseeriaatsimillu aaqqissusseqqinneq innuttaasut naligiinnginnerulerunissaannik suliniutitaqarpoq, sulinerup imminut akilersinnaanerunissaanik siuarsasut aammalu Attassiinnarnissamut Ineriartortitsinissamullu Pilersaarut 2-p nunatsinni aningasaqarnerup piffissami sivisumi attassinaanissaa siunertalarugu piviusunngortinnissaanik tapersiisussaq ukioq manna siusinnerusukkut isumaqatigiissutaavoq.

Naalakkersuisut akileraartarneq pillugu isumaqatigiissutip ilaatigut piviusunngortinnissaanut siunnersuut immikkoortumi 13-imi suliarineqartussaq manna ukiakkut ataatsimiinnermi saqqummiutissavaat. Ataatsimut isigalugu ilisimatitsissutigineqarsinnaavoq aaqqissusseqqinneq 70.000 kr.-t sinnerlugit isertitaqartartut tamangajammik isertitaat qaffassapput. Aaqqissusseqqinermi pissarsisussaanerpaat tassaapput innuttaasut akileraartartut 150.000 aamma 300.000 kr.-t akornanni isertitaqartartut. Ilaasa isertitaat akileraarutit kingorna ukiumut 15.000 kr.-it missaannik qaffariassapput. Tassa akileraarutit kingorna qaammammut 1.200 kr.-t sinnerlugit pissarsiaqarnerulernissaat inatsimmi suliarineqarluni.

Aningaasanut inatsisisstatut siunnersuummi pingaarnersiuinerit

Naalakkersuisut 2025-mut aningaasanut inatsisisstatut siunnersuummi suliniutit arlallit pingaaruteqartut nunatsinni atugarissaarnermik ineriartornermillu pitsannguisussat pingaarnersiorpai.

Siunnersuutaavoq peqqinnissaqarfimmut aningaasanit 2024-mi atugassanngortinneqartuni suliniutit ingerlateqqinnissaannut ukiuni sisamani tulliuttuni 31,6 mio. kr.-t immikkoortinnejassasut. Taakku peqqinnissaq pillugu isumaqatigiissummi suliniutit pingartinneqarnerpaat, tassunga ilanggullugit katsorsaanermik pinaveersaartitsinermillu pitsannguinerit aningaasalerneqassapput. Siunnersuutaavoq aamma piumassuserinngisamik meerartaarsinnaanngitsut peqqinnissaqarfimmeli aalajangersimasumik neqeroorutinut aamma nuna tamakkerlugu misissuisarnermik pilersaarusiornissamut peqqissaasunullu nunanit allaneersunut akuersissuteqartarnermik nunatta nakorsaaneqarfiata suliarinninneranik annertusaanermut 8,7 mio. kr.-t immikkoortinnejassasut. Naalakkersuisut ilisimaarilluarpaat, aalaneruneq aamma ataatsimooqatigiittarneq tarnikkut timikkullu peqqissutsimut pitsanngorsaasartoq. Taamaammat Naalakkersuisut Kalaallit Nunaanni Timersoqatigiit Kattuffiata Nunarsuarmi timimik aalatitsinerpaatut anguniagaa tapersorsorpaat, taamaammat inuiaqatigiinni tamatuminnga suliniutinik siuarsasunik suliaqassaagut.

Pinaveersaartitsineq aamma sallutinnejassaaq, pingartumik oqarasuaatikkut siunnersuisarfimmut TUSAANNGA-mut aningaasaliissutit annertuuvinissaat pisariaqarpoq. Siunnersuutaavoq 2025-mi 2026-milu aningaasaliissutit ukiumut 7,5 mio. kr.-nik tamatumalu kingorna ukiumut 3,75 mio. kr.-nik amerlineqassasut. Tamatumani Tusaannga ullut tamaasa ulloq unnuarlu ammasarnissaa qulakkeerneqassaaq, tamatumallu malitsigisaanik siunnersorneqartut amerlanerulissapput pitsaassuserlu qaffatsinnejarluni. Tusaannga ingerlalluartoq aamma Nuna Tamakkerlugu Tarnikkut Piginnaanngorsaavimmik Siunnersuisarfimmullu Naalakkersuisut suliniutitigut tunngavissiatigut

akuersissutigeqqammigaanut atassuteqarpoq tamannalu 2024 naalernerani naammassisussatut naatsorsuutigineqarpoq.

Naatsorsuutaavoq innarluutillit pillugit inatsit nutaaq manna ukiakkut ataatsimiinnermi saqqummiunneqassasoq. Inatsisissatut siunnersummi inunnut innarluutillit pillugit pinaveersaartitsineq iliuusissanullu ikuutaasussat kiisalu innarluutillit pisinnaatitaaffeqarnerunissaannik qularnaarisut sammineqarput. Tamannalu inatsit pingaarutilik kingusinnerusukkut maani inersuarmi sammineqarnissaanut Naalakkersuisut qilanaarput. Missingerneqarpoq inatsisissatut siunnersuummut aningaasartuutit 2025-mi 6,4 kr.-ussasut, 2026-mi 12,8 mio. kr.-ussasut, 2027-mi 10,3 mio. kr.-ussasut tamatumalu kingorna ukiumut 7,8 mio. kr.-ullutik. Tassa katillugit 37,3 mio missaat aningaasaliissutissatut siunnersuutaasuni innarluutillit pillugit sulianik eqaannerusunik ilaatigut digitaliunerusumik immikkoortitsisoqassaaq, tassani suliarinnittarneq assigiissaarneqassaaq sukanerulerlunilu kiisalu inatsisissatut siunnersummi innarluutillit suliassaqfianut pitsangorsaanerup malitsigisaatut kommunit aningaasartuuteqarnerunerannik matussusiinissamut aningaasaliisoqassalluni. Tamatumunnga saniatigut inuit innarluutillit peqatigiiffiannut nukittorsaanissaq pisariaqarmat ukiumut 1 mio. kr.-nik aningaasaliisoqassaaq, taakkulu suliassaqfimmut kajumissutsimik suliaqartunut pitsangorsaanerussalluni.

Aalisarneq pillugu inatsisimmi nutaami, 2024-mi upernaakkut akuerineqartumi, aningaasanut inatsiseqarfiusumi ukiuni sisamani katillugit 9,5 mio. kr.-nik aningaasaleeqqinnissaq pisariaqarpoq, ataatsimullu isigalugu piffissami 2025-2028-mut aningaasartuutit 2025-mi illu siunissami aningaasartuutinut aalajangersimasunut immikkoortinneqarlutik. Tamatumunnga atatillugu ilisimatitsissutigineqassaaq, Naalakkersuisut suleqatigiissitaliamik Nunatsinni Aalisarnermi Aningaasaqarnerermik Ilisimatusarfimmik 2025-mi Ukiakkut Ataatsimiinnermi 2026-mut Aningaasanut inatsisissatut siunnersuummut atatillugu suliaqartussatut naatsorsuutigineqartumik suliaqartussamik pilersitsinikuusut.

Nunat allat eqqarsaatigalugit nalinginnaasumik annertusaanissaq siunnersuutaavoq, tassunga ilanngullugit Kalaallit Nunaata sinniisoqarfiiinut aamma Ottawami, Canadami, sinniisoqarfimmik nutaamik pilersitsinermut aningaasat ilaneqarnerat. WTO pillugu aamma suliaqartartumut nutaamut niuertarnernut aamma Issittoq pillugu Siunnersuisoqatigiinni suliniutit annertusarnissaannut aningaasaliisoqarnissa siunnersuutaavoq. Ataatsimut isigalugu suliniutinut taakkununnga ukiut sisamani aningaasaliissutit 18,4 mio. kr.-ussasut siunnersuutaavoq.

Ikiaroornartut unioqqutitsilluni eqqussorneqartarnerisa annertusiartornerat tunngavigalugu, akitsuuserivinni nakkutiginninnermilu aanngajaarniutinik suliat sukumiinerulernissaat pisariaqarpoq. Taamaammat tamatumunnga ukiumut 5 mio. kr.-nik aningaasaliisoqartarnissa siunnersuutaavoq. Tassa katillugit 20 mio. kr. ilanngaasserisut nukittorsaaffigineqarnissaat pissaaq. Aningaasat taakku akitsuuserisut amerlisinnerannut atorneqassapput, naatsorsuutaallunilu suliaq tamanna nuna tamakkerlugu pissasoq, kisiannili Tunumi Kitaanilu pinerussalluni.

Nunarput Parisimi isumaqatigiisummut ilanngunniarluni suliniuteqassasoq Inatsisartut aaliangiiffigivaat, taamaattumillu silap pissusaa pillugu suliniutinut aningaasat amerliliinissaq, tassungalu ilanngullugit nuna tamakkerlugu silap pissusaa pillugu periusissiamik ineriartortitsineq aamma Issittumi Siunnersuisoqatigiinni avatangiisit silallu pissusaa pillugit suliaqartunut tapersiineq pisariaqarpoq. Siunnersutaavoq aningaasanut inatsiseqarfimmi siunertanut taakkununnga 3,15 mio. kr.-t immikkoortinnejassasut.

Ilinniartitaanermi Naalakkersuisut ilinniartitaanermut periusissiaat nutaaq naapertorlugu suliniutit nutaat aallartinnejassapput. Meeqqat, inuuusuttu inersimasullu naqinnernik ilisarinnissinaanngitsut aamma atuarnissamik allannissamillu ajornartorsiuteqartut ikiorsernissaannut nunat tamakkerlugu pilersaarummi suliniutit ingerlannissaannut aningaasaliisoqassaaq. Meeqqat atuarfiata pitsaassusaanik misissueqqissaarnermut aningaasaliisoqassaaq. Ilinniartitaanermi suliniutinut taakkununnga aningaasanut inatsiseqarfiusumi katillugit 8 mio. kr.-t immikkoortinnejassapput.

Aningaasanut inatsisissatut siunnersuut naggasiullugu sanaartornernut aningaasaliinernik imaqarpoq. Suliat taakku nuna tamakkerlugu siammassisumik sanaartornermik imaqartut agguardeqarsimasut erseqqissaatigissallugu pingaaruteqarpoq. taamaammallu inoqarfinni arlalinni inuuusuttu inissaannik aamma inissianik attartortagassanik sanaartornerit, nakorsiartullu kiisalu illoqarfiit nunap ilaani peqqinnissaqarfiup sulisussaannut inissianik sanaartornerik aallartitsinissanik imaqarlutik.

Tamatuma saniatigut amerlanerusut nunatsinni ilinniagaqarsinnaaneranni ajornartoorfiusut annikillisinnejarnissaat pillugu Naalakkersuisut pilersaarutaasa ilaagaat assassinermut ilinniarfiit Sisimiuni annertusarnejassasut, ilinniartullu inaannik sanaartornissanut Saviminilerinermik Ilinniarfiup nutaamik pilersaarusiornissamut aningaasaliissuteqartoqarluni. Sanaartornissamut pingaarnersiuinerit Naalakkersuisut Attassiinnarnissamut Ineriartortitsinissamillu pilersaarut II-mi aningaasaliinerannut ilapittuippuit.

Aningaasanut inatsisissatut siunnersuummut allannguutissatut siunnersuutigineqartussatut naatsorsuutigineqartut

Aningaasanut inatsisissatut siunnersuutip aappassaaneerneqarneranut pingajussaaneerneqarneranullu pisarnertut allannguutissatut siunnersuutit arallit saqqummiunneqarumaartut naatsorsuutigineqassaaq. Allannguutissatut siunnersuutit ilaat ilisimaneqareerput, allallu isumaqatigiinniarnerit pisariaqartitsinerilluunniit siumut naatsorsuutigineqanngitsut kingunerannik saqqummiunneqassallutik.

Siunissami suleriaqqinnissaq

Aningaasanut inatsit ukiunut aggersunut kisimik tunngasarnera pissutigalugu piffissamut sivikitsumut atuutuusartoq ilisimavarput. Aningaasanut inatsit pisortat ingerlatsinerisa tamarmiusup qanoq ineriartornissaanik takutitsisunik piffissamut sivisunerusumut aningaasaqarnermut pilersaarutinik ilaneqarnissaa paassisallugu pingaaruteqarpoq. Taamaammat aningaasanut inatsisissatut maannakkut siunnersuut siunissami atugarisassatta politikkikkullu iliuuseqarsinnaatitaanerup qulakkeernissaannut piffissami sivisuumi

suliaqarnissamut alloriarnissaq ataasinnaavoq. Tamanna anguniarlugu aaqqissusseqqinnissat sinaakkutillu sungiusimasat allanngortinnissaannut piumassuseqarnissaq pisariaqarpoq.

Aaqqissusseqqinnerit allannguinernik kinguneqassapput, taamaammallu nutaanik pilersitsinermik kinguneqassallutik. Suliassat nutaamik qanoq aaqqinnissaannut akisussaassuseqalerniarluta nassaarniarlatalu isummat naapisittarnissaat pisariaqarpoq.

Aningaasanut inatsit attassinnaasup siumullu isiginniffiusup sabinngisamik amerlasuunit taperserneqarluni akuerineqarnissaa Naalakkersuisut kissaatigaat. Aningaasanut inatsisissatut siunnersuut saqqummiunneqartoq ukiut sisamat ingerlanerini katillugit 5 mio. kr.-nit missaannik sinneqartoorfieuvoq. Politikkikulli sulinermi partiit tamarmik aningaasanut inatsisip aappassaaneernissaata pingajussaaneernissaatalu tungaanut isumaqatigiinniarnermi peqatiseraagut, aningaasaliissutissatummi siunnersuutit piviusorsiortumik akisussaassusilimmillu suliaqarnermi suli allanngortinneqarsinnaanissaat periarfissaasoq oqaatigerusukkatsigu.

Ukiuni aggersuni aningaasartuutinut nutaanut aningaasat killeqartorujussuunerat paassisallugu pingaaruteqarpoq, tamannali siammasissumik suleqatigiinnissamut akornutaasariaqanngilaq. Akisussaaqataanissamut piumassuseqartoqarnissaa neriuutigaara, aamma aningaasaqarneq sukateriffingeqarluartoq. Taamaalillunga aningaasanut inatsit suliarineqarnerata kingorna 2025-mi aningaasanik inatsimmi aningaasartuutaaqqissinnaasunik arlalinnik saqqummertoqarnikuunera maannangaaq ilimasaarutigeriissavara. Taamaammat naatsorsuutigineqassaaq, aappassaaneerisoqarnerani allannguutissatut siunnersuummik ilaatigut aningaasartuutit annertusineranni peqqinnissaqarfimmut aningaasaliissutit innuttaasut agguataarnerannik aaqqiinissaq aammalu Neqi A/S-imut sullissinissamik isumaqatigiissutip nutaap isumaqatigiissutiginera pillugu saqqummiussisoqassasoq naatsorsuutigaarput. Aningaasartuutit taakku aningaartuutaanerulersinnaasunut atorneqarsinnaanerata malitsigisaanik aammalu partiit kissaateqarnerisa malitsigisaannik qanoq aningaasalersorneqarnissaat Naalakkersuisuni suliassaraarput. Taamaammat aningaasartuutaanerusussatut siunnersuutit malitsigissavaat sipaarutissatut siunnersuutinik malitseqartinneqartarnissaat ingerlatsinissaq.

Naatsorsuutigineqarmat inatsisissatut siunnersuut Aningaasaqarnermut Akileraartarnermullu Ataatsimiititaliamut suliassanngortinneqassasoq, ataatsimiititaliap sulilluarnissaanik kissaappakka, isummennillu ilassuteqarnissaa ataatsimiititaliap kissaatigissappagu piareersimavunga.

Taamatut oqaaseqarlunga 2025-mut aningaasanut inatsisissatut siunnersuut Inatsisartunut suliassanngortippara.